



**Suleqatigiissitamik immikkut ilisimasalinnik inuttaqartumik meeqqat atuarfiannik iluarsaaqqinnissamut kaammattuutitalimmik nalunaarusiortussamik pilersitseqquullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamanut tunngasunik kaammattuutit saniatigut nalunaarusiaq meeqqat autismemik; ADD/ADHD-mik annilaangasarnermillu nappaateqartunut sammisumik meeqqat atuarfianni immikkut ilinniartitsinernut neqeroorutinut kaammattuutinik imaqassaaq. Nalunaarusiaq UKA 2025-imut atatillugu Inatsisartunut agguanneqassaaq.**

(Inatsisartunut ilaasortaq Anna Wangenheim, Demokraatit)

Siumumiit siunnersuuteqartumut, Anna Wangenheimimut Demokraatineersumut qujavugut.

Siumuminngaanniit nunarsuarmi meeqqat immikkut pisariaqartitsisut amerliartornerat malinnaaffigaarput, taamaatumillu nunatsinni aamma taamatut pisoqarnera eqqummaariffagalugu. Uanga nammineq §37-imik apeqquuteqarnikuuvunga nunatsinni STU-mik pilersitsisoqassamaarnersoq, tamannalu ersernerluttumik paatsoorpalaartumillu akineqarpoq, naammaginangitsumik. Tassami STU tassaagami meeqqat atuarfianni naliginnaasumik atuarsinnaanngitsunut atuarfik, §37-imilu inuuusuttuaqqanut ilinniarfik kisimi ukkatarineqarluni. Uggornaqaaq ersarissuliortoqanngimmat.

Siumumit aamma Naalakkersuisup uunga siunnersummut akissuteqaataani maluginiarparput Ilinniartitaanermut Siunnersuisoqatigiinnik pilersitsinermi meeqqat atuarfiat, tassanngalu immikkut pisariaqartitsisut aammalu saniatigut innarluuteqartut pillugit nalunaarummeersunit siunnersuuteqartup siunnersuutaata iluaniittunik suliaqassamaartut. Misissuineq pinagu iliuuseqarsinnaanermik nipeqartumik pilersitsinissaq siunnerfigineqarsinnaagaluartoq Siumumiit isumaqarpugut. Naalakkersuisummi akissuteqaataani Ilinniartitaanermut Siunnersuisooqatigiit uumap qulequtaasup iluaniittunik siunnerfeqarpalupput, kisianni eqqortumik allaqqasoqanngilaq ilumut ersarissumik suut misissorneqassanersut. Aammalu ilinniartitaanerumut periusissiami itisilertumik allaqqasoqanngilaq, taannalu saqqummiisoqarnerani erseqqinnginnera maluginiarparputtaaq. Taamaammallu Siumumiit siunnersuuteqartup siunnersuutaata ersarissumik akineqanngimmat uggoralutigu.

Naalakkersuisut siunnersuut itigartinneqassasoq siunnersuutigivaat. Siumumiilli tamanna isumaqatiginngilarput. Qulaani tunngavilersuutikka aammalu tunngavilersuutigilikakka pillugit Naalakkersuisup itigartitseqqusinera ilalinnginnatsigu.



Naak suliniutit assingusut aallartinniarneqaraluartut atuarfeqarneq pillugu misissuinerni kommunet atuarfinnut tunngasunut susassaqartuunerat ersersinneqarpiarneq ajorpoq. Tassanilu aamma taanngitsoorusunngilarput atuarfiit aqunneqarneri. Aqtsinermik tunngasunik, uani kandidaternermi, ilinniarsimanngikaanni iluamik atuarfimmik aqtsinissaq ilaatigut ajornakusoorpasittarpoq, sualuppoq atuarfikkaamiikkaanni. Assersuutissaqarluarpormi. Ilisimasat pitsaasut suligasuarnermi sinaakkusiinnerit assigiinngitsut pitsaasut suliffeqarfimmi pilertartut ilisimavagut. Ittoq ningiorluunniit taarserneqarnerani malunnaatilerujussuarmik atuarfik allangorsinnaasarpoq. Taamaammallu suliaq pillugu ilisimasaqarluarnissaq aammalu aqtsinermik ilinniarluarsimaneq pingaaruteqartorujussuupput.

Kommunalbestyrelsit pingaaruteqarluinnartumik inissisimapput. Taakku atuarfiit aningaasalersorneqarni aqunneqarnerisalu nakkutigineqarneri nakkutigisisussaammatikkit. Atuarfeqarnermut paasisimasaqarneq, inunnik isiginnittaaseqarneq minnerunngitsumillu ilikkarsarnermut pædagogikimillu ilisimasaqarluarnissaq siuttunit pingaaruteqarluinnartoq Siumumit naqissuserusupparput.

Kommunet atuarfinnut suliniutigisartagaat inatsisitigut sinaakkutit aallaavigalugit sulisarput. Atuarfinnut tunngasunut misissuisarninni paasinarsivoq STU aammal Special Pædagogisk Støtte (SPS) ilisimaneqarpiangngitsut, Danmarkimi taakku kommunet ingerlatarivaat. STU-mi sulisut immikkut immikkut pisariaqartitsisunut ilinniagaqartiterput saniatigullu pædagoginik atorluaasorujussuullutik. Taamatuttaarlu aamma STU-mit ingerlariaqqiffiusoq, ilinniarnertuunngorniarfik immikkut ilisimasalinnik ilinniartitsisullit aaqqissuulluagaasorlu, pædagoginik atorluaasorujussuupput.

Imaannaanngitsuuvoq kivitassaq. Kisianni immikkut atuartinsinermut tunngasunuffaarik ilinniartitseqqiinikkut aammal pædagoginik atorluaanikkut kivinneqarsinnaalluarpoq.

STU Aalborgimiittoq pulaarnikuura. Sisamanik immikkoortortanik aggugaavoq. ADHD-ertunut annilaanganermillu pigisaqarlutik atuarusukkunnaarnikunut Immikkoortortaqaarfik, autismeqartunut immikkoortortaqaarfik, sakkortunermik autismeqartunut immikkoortortaqaarfik kingullerlu arlalinnut timikkut eqqarsartaatsikkullu innarluutilinnut immikkoortortaqaarfik. Meeqqap immikkut pisariaqartitai akisuut kommunemut SPS-inik qinnuteqartarpot. Kommunemilu immikkoortortaqaarput sag-inik qitiusumik katersiffik, meeqqat atuarfiat naammassippat allaat taakku sag-it atorneqartarlutik.

Nunatsinni tamakkut tamarmik atuutinngillat. Meeqqat atuarfiannit sag-it ingerlariaqqiffiit pigineq ajorpaat. Majorami IT-Reg-eqarpoq, taannalu meeqqat atuarfiannut atanngilaq, taamaallaat meeqqat atuarfiannik naammassinnilersut sumut ingerlariaqqinnissaanut nalunaarutit tassunga ikkusuunneqartarput, taakku ukiakkut aqqtissiuussisunit atorneqartarlutik.

Inuuusuttuaranngorlaaq meeqqat atuarfianit naammassisoq ingerlariaqqiffinnukaraangami amerlasuutigut immikkut pisariaqartitsisuunersoq naluneqartarpoq, amerlasuutigillu ilinniarnini aallartereeraangagu ilinniarfiup nammineerluni susoqarnersoq ujartulertarpaa,



suliarujussuusarpoq sivisorujussuusinnaasarlunilu, amerlasuutigillu ilinniartoq kiisa ilinniarusukkunaaareersimasarpoq.

Aammalu MISIp aaqqissuussaanera eqqarsaatigeqqittariaqavisoq isumaqarpugut. Taannami aqqutigalugu aatsaat meeqqat nakorsamit misisortinneqarnissaat aalajangiunneqartarpoq. Avinngarusimasuniilluni ila MISI utaqqinartassaqaaq. Tusarpavummi meeqqat ilanngui ima ikiorneqartariaqartartigisut, innarluutiminnik, allaat misisorseqarnissamut utaqqisitaanermanni inuunertik kiperusuttaraluaraat. Atuarfiit immikkut pisariaqartitsisunik peqartuaannartartut MISIp aaqqissuussaanerata inisisimaneranut meerartagut amerlasuut naalliutsippagut. Toqqaannarlu psykiatrimut sulissutiginninniarsarisinnaaneq ajornaqaluni, nunatsinni psykiaterinik tusiapingaaratta.

MIO uunga siunnersummut aamma oqaasertaliussaqarpoq, siunnersuut tapersorsorlugu. Atuartitaanerlu pineqarpat meeqqat isumaannik tusarniaanissaq mininneqassanngitsoq oqariartorfigaluta. Siumumiit tamanna ilalerparput, puigussanngilarput Atuarfitsialak sinaakkuserniarneqalermat meeqqat ataatsimeersuartinneqarmata, Naalakkersuisunullu tamanna puigoqqunanneqaaq. Massakkut atuarfiit Nakuusaaraqarrapput saniatigullu NAKUUSA Ap meeqqat isummersorfeqarlutik, taakku isumasiorneqarnissaat Siumumiit inassutigaarput. Meeqqammi tappiffingisatsinnik tappiffeqarput, pitsaasunillu siunnersuusiorsinnaalluartut nalunngilluarlutigu.

Inatsisartoqatikka, nunatta aningaasarsiornissaa eqqartoraangatsigu, sualuppoq aalisakkat piniakkallu pillugit, ulloq naasinnaasarpalput maani oqallilluta. Perorsaaneq, atuarfeqarneq, ilinniartitaaneq immikkullu pisariaqartitsisut pillugit pilersaarniaraangatta itinerusumik eqqartuineq ajorpugut. Siunissarput aali pineqartoq. Aningaasarsiortussagut.

Niu napippat erngertumik suliarineqapallattarpoq. Ersinngitsukkulli innarlersimasut erngertumik iliuuseqarfigineqassanatik. Ersinngitsut avatitulli ipput, pingarneruppulluunniit.

Nunatsinni autismertut immikkut isiginianngilagut. Nunani allani autsimellit arlallit diamantiutigineqarput, taakku pikkoriffik ataaseq itisoorujussuarmik, inuk nalinginnaasutut isigisartakkatta sapigaanik, ilisimasaqalertarmata.

Taamaammallu paedagogik nunatsinni pisariaqarluinnarpoq itisilertumik samminissaa, aammalu kandidatimut immikkullu sammisumik ilinniartitseqqiisarnermut tunngasunik siunnerfeqartarnissarput sukataarulluinnartariaqarparput.

Siumumiit taamatut oqaaseqarluta siunnersuut Ilinniartitaanermut Ataatsimiisitaliamut ingerlateqqipparput.

[Oqaaseqartoq, Najaaraq Møller, Siumut]